

# Vun driweriwer

---

erscheint auf [www.lenauheim.de](http://www.lenauheim.de)

monatliche  
Erscheinung

Februar 2022

von *Helen Alba*

## Es is wenich derdriwert gered gin

In unsrer Familie is wenich iwer die Russlandverschleppung gered gin. Un doch, sie hans mitgemacht: Mutter, Ota un die Taafgoth. Als Kind han ich zwar gewisst, dass die Mutti als blutjunges Mädgl vun derhem fort hat misse un weit weg in der Fremd schwer gearweit hat. Wahrscheinlich hat mer mei selmols glicklichi un zufriedeni Kindheit nit mit Einzelheite triewe meehte. Des han ich wenschtens gement. Bis ich dann, schun greesser, vun meim Urota meh iwer selli unseelichi Zeit erfahr han. Er hat mich uf sei Schoß ghol, ganz lieb an sei Bruscht gedrickt un mit zittricher Stimm verzählt: „Kind, du muscht deiner Mutti des nit iwl holle, wann se nit iwer selli Zeit rede meeht. Sie is am 12. Jänner 1945 18 Jahr alt gin. Mer hat domols schun munkte gheert, dass was Schreckliches in der Luft leit un uf uns zukumme werd. Mir han es Mari tachsiver verstopelt, weil die Schandare anfang han in de Häiser Mädle, Buwe, Weiwer un Männer zu suche. Dei Ota han se ghol. Un weil se dei Mutti nit gfunn han, han se mich wie e Schwerverbrecher mitm Maschinengewehr in de Hifte bis zum Kamin getrieb. Weil ich nimi de Jingschte war, han mer halt doch es Mari geger mich ausgetauscht. Es war es enzichi Kind, vielleicht a bissl verwehnt. Un hat die schweri Zeit in Russland dorchstehn misse. Noh zwaa Jahr is es Mari dann mit eem Transport uf Ostdeutschland kumm, in die Näh vun Dresden. Es ware ach anri Bogaroscher derbei. Sie sin bettle gang, um iwerlewe zu kenne. Doch e herzensguti Frau, des war die Sabine Bösl, hat Mitleid mit deiner Mutti ghat un hat se in die Familie ufghol, bis se Ende April 1947 hem hat kumme kenne. Es war e ganz anres Mari, des hemkumm is. Abgemagert, versteert, verängschticht, schei.....“

## Die „Bäsl“ war e „Bösl“

Un selmols is mer ach e Gschicht klor gin, die Mutti efter verzählt hat. Sie un anri Bogaroscher ware in eem kleene Dorf in Ostdeutschland. In armseelicher Kleidung sin se an eem Sunntach in die katholischi Kerch nin gang. Vum Chor aus sin bekannti Kerchelieder gsung gin. Sie han sich im Mittelgang ufgestellt un anfang zwaastimmich mitzusinge. Uf eemol is es ufm Chor still gin un nor unser Bogaroscher han gsung. Noh der Mess is de Pharre gleich hin zu ihne gang un hat se gfroot, wer se sin un wuher se kumme. Er hat se ach an Familien zugeteelt, die gut zu ihne ware. Un Mutti hat immer dervun verzählt, „wie gut die Binne Bäsl zu ihr war“. Die Binne Bäsl war jo die Frau Sabine Bösl!

## „Niemand liebt dich so wie ich“

So staat un staat hat es Mari dann wieder ins normali Lewe zuruck gfunn. Vill Stachle, Angscht un Schrecke sin awer hafte geblieb un han se e ganzes Lewe lang verfolgt un geploot. Es Mari hat Akkordeon gspillt un arich scheen singe kenne. 1948 hats uf der Bogaroscher Bühne gstann un aus der Operette „Paganini“ vun Franz Lehar „Niemand liebt dich so wie ich“ in de Saal gsung un ufm Akkordeon begleitet. De Seppi (mei Vater) hat ke Au vum Mari losse kenne. Am 8. März 1949 han se gheirat un bis ins hohi Alter in Freed un Leed zammghal. Unser Herrgott soll se in Friede ruhe losse!